



Inatsisartuni ilaasortaq,  
Justus Hansen, Demokraatit  
-/MAANI

**§ 37 naapertorlugu apeqquteqaat nr. 006\_2021, qilalukkat qernertartassat pillugit, matumunnga ilanngullugu NAMMCO-mut ilaasortaaneq aammalu piniartut ilisimasaat pillugit.**

Ulloq: 25-01-2021  
Suliap normua: 2021 - 1090  
Akt normu: 15824807

Postboks 269  
3900 Nuuk  
Oqarasuaat (+299) 34 50 00  
Fax: (+299) 34 63 55  
E-mail: apn@nanoq.gl  
www.naalakkersuisut.gl

Inatsisartut suleriaasissaanni § 37 imm. 1 naapertorlugu qilalukkat qernertartassat pillugit Naalakkersuisunut apeqquteqarsimavutit, tassunga ilanngullugu NAMMCO-mut ilaasortaaneq aamma piniartut ilisimasaat pillugit. Apeqqutit uanga oqartussaaffinnut akisasatut innersuunneqarsimavoq.

1. *Tunumi qernertanik qilalugartassiissutinut aaliangiinermut Tunumi piniartut aalisartullu Kattuffii qanoq annertutigisumik akuutinneqarpat?*

*Akissut 1)*

Ukiut tamaasa Naalakkersuisoqarfik sivikinnerpaamik sapaatit akunnerinik 5-nik piniagassat killilersorneqartut assigiinngitsut pillugit tusarniuteqartarpoq, minnerunngitsumik qilalukkat qaortat aamma qernertat ukiumi tulliuuttumi pisassiissutissat pillugit. Imartami pineqartumi piniartut, kattuffiit aammalu allat nunami maani attuumassuteqartut sunniuteqaqataasinnaapput tusarniarneqartumut akissuteqarnermikkut, tassani nassuiaatigineqartut aammalu pisassat kissaatigineqartut nalilersuineri ilanngunneqartarmata. Tamanna periarfissaq Tunumi piniartunut kattuffiinullu allaanerussuteqanngilaq.

Imartami pineqartumi piniartut aammalu peqatigiiffiit noqqaassutaat kissaatigisaallu aalajangiinissaq sioqqullugu nalilersuutigineqartuni ilanngunneqartarput. Nalilersuineri noqqaassutaat piviusunngorsinnaanersut nalilersorneqartarput. Tunumi ilisimatuussutsikkut siunnersuineq 0-iuppat, taannalu piniartunit illuatungilersorneqarpat, oqimaaqatigiissaarinissaq ujartorneqartarpoq, piorsarsimassutsimut attatiinnartitsisussa q aammalu neqjissaqarniarneq tunngavigalugit, qilalukkat qernertaqatigiinnut annerusumik innarliutaanngitsumik, Naalakkersuisut mianersornissamik periuseqarnermut pisussaaffeqarmata.

2. *Naalakkersuisut piniartut siunnersuutaanniit biologit NAMMCO-llu siunnersuutaannik pingaartitsinerusutut innerat sumik pissuteqarpa?*

*Akissut 2)*

Naalakkersuisut biologit aammalu NAMMCO-p innersuussutaat piniartut innersuussutaanniit pingaartinnerunneqanngillat, takuuk piniarneq aallaaniarnerlu pillugit § 2-mi Naalakkersuisut illuatungeriinnik tamakkiisumik eqqarsaatiginnittussaataanerat. Ajoraluartumik ullumikkut piniartut ilisimasaat uppernarsaatitalersukkamik tunngavilersuutitalinik biologit pisarnerattut aqqissuulluakkamik allatorneqartanngillat. Ilisimatuussutsikkut innersuussinerit saqqummiunneqartarput misissuinerit aalajangersimalluinnartut naapertorlugit uppernarsaanerit tunaartaralugit, biologinit misissuineri attuumassuteqanngitsunit uppernassutsimikkut misissorneqarsimasut. Assersuutigalugu ilisimatuussutsikkut pisassiissutinut amerlassusiliinerit qilalugaqassutsip annertussusaanik nalunaarusiap naatsorsorneqarnerata procent-itarisinnaavaa. Piniartut tusarniaanermi amerlassutsinik

kissaateqarnerat piffimmi pineqartumi namminneq pisariaqartitaannut tunngassuteqarsinnaavoq. Ajoraluartumik piniartunit ilisimasat uppersaasorsorlugit piffissami qanittumi allatorneqarnikuunngillat, assersuutigalugu ingerlaarfiinut tunngasut, neriniarfiinut tunngasut, piaqqisarnerinut tunngasut, qilalugaqatigiikkuutaat isikkuinut tunngasut assigisaallu. Piniartut allallu atuisut qularnangitsumik ilisimasalerujussuupput taamaattoq aaqjissuussamik KNAPK-mit imaluunniit peqatigiiffiinit allatorneqarsimanngitsunik.

Aalisarnermut, Piniarnermut Nunalerinermullu Naalackersuisoqarfik (APNN) kingullermik Novemberimi 2020-mi ataatsimiinnermi neqerooruteqarpoq qilalukkat qernertat pillugit piniartut atuisullu ilisimasaannik aaqjissuussamik allaaserinnittoqassasoq kiisalu biologit piniartullu akornanni suleqatigiinneq pitsanngorsarneqassasoq. Naalackersuisoqarfiup piniartut immikkut suleqatigai aammalu biologit immikkut suleqatigalugit. Naalackersuisoqarfiup kingullermik 2020-imi upernaakkut piniartut biologillu akunnerminni pitsaanerusumik suleqatigiinnissaat kaammattuutigaa ukiorpassuarni KNAPK-p Pinngortitakeriviullu akunnerminni suleqatigiinnissamik isumaqatigiissutaata saniatigut.

APNN piniartut atuisullu ilisimasaannik katersineri suleqataanissamik neqeroorsimavoq Tunumi qilalukkat qernertat pillugit ukiumoortumik NAMMCO-mi ataatsimiinnissamut atavillugu, takuuk aamma apeqqutip 4-p akissutaa.

3. *NAMMCO-mut ilaasortaanerimi pitsaaqutit pitsaanngequtillu suunersut Naalackersuisut qanoq nalilerpaat?*

*Akissut 3)*

1980-ikkut naajartorneranni Kalaallit Nunaat nammineerluni imarpiup avannaani miluumasunut tunngatillugu suleqatigiisitaliornissamik (NAMMCO) pilersitsiniarnermut peqataanikuuvuq, taamanikkut Ministeriusunit (Kalaallit Nunaat, Island, Savalimmiut aammalu Norge) NAMMCO-mut Isumaqatigiissutip atsiorneqarneranik kinguneqartumik, tassunga ilanngullugu 1992-imi Nuummi taamanikkut Aalisarnermut Piniarnermullu Naalackersuisuusumit atsiorneqarluni. Takuuk aamma apeqqutit 5-mut 6-mullu akisuteqaatit.

4. *Kalaallit Nunaanniit qanoq iliorluta tunumi piniartut maluginiagaannut NAMMCO-mi biologinut paasinnitsissinnaavagut?*

*Akissut 4)*

2019-imi aamma 2020-mi APNN KNAPP-miunik ataatsimeeqateqartarsimavoq aammalu Tasiilami eqqaamiuinilu innuttaasut, Ittoqqortoormiini kiisalu Qaanaami aammalu Siorapalunni ataatsimeeqatigisarsimallugit tamatumani ilisimasanik misilittakkanillu avitseqatigiinnissaq siunertaralugu. APNN-imit piniakkat assigiinngitsut killilersukkat aqunneqarneri saqqummiunneqarput immikkut pingaartillugit nannut kiisalu qilalukkat qaqortat qernertallu. Piffimmi pineqartumi piniartut ilisimasaminnik oqaluttuarput, nunap assingani titartaanikkut. APNN-imit siunertaasimavoq sulilu siunertaalluni piniartut ilisimasaannik allaaserinninnissaq NAMMCO-mi 2021-mi ukiumoortumik ataatsimiinnermut, Naalackersuisunut aammalu allanut attuumasuteqartunut saqqummiutassamik. Ukiumoortumik NAMMCO-mi ataatsimiinnissaq Martsimi 2020-imi pisussaasimagaluarpoq, taamaattoq 2021-mut kinguartinneqarluni Covid-19 peqqutigalugu. 2021-imi NAMMCO-p ukiumoortumik ataatsimiinneranut siunertaavoq piniartut Tasiilameersut aamma Ittoqqortoormiineersut Tunumi qilalukkat qernertat pillugit ilisimasaat pillugit saqqummiinnissaq, kinguliini immikkoortut taaneqartut aallaavigalugit:

- Tasiilap Ittoqqortoormiillu qilalugaq qernertaqarfiit

- Ingerlaatarfiit
- Neriniartarfiit
- Qilalukkat qernertat piaqqiortunut ilisimasaat
- Tunumi qilalukkanik qernertanik inuussuteqarnermut tunngasut ileqqut
- Tasiilami Ittoqqortoormiini qilalukkap qernertap inuuniarnermut kulturimullu pingaaruteqassusaa
- Tunumi qilalukkanik qernertanik kisitsinermut misissuinerimullu piniartut peqataanerat imaluunniit peqataannginnerat.

Malugeqquneqarpoq NAMMCO-p 2021-mi ukiumoortumik ataatsimiinnissaa qarasaasiatigut ingerlanneqassamat martsimi Covid-19-p aammalu B-117-p (Covid 19-miit allaaneq) peqqutigalugu, taamaammallu siuliani eqqartorneqartutut Kalaallit Nunaata saqqummiisinaanera oqaatigissallugu ajornakusoorallarpoq, qarasaasiakkut ataatsimiinnissamat aalajangiineq peqqammermat periusissallu sulii qanimut inissivinnatik.

*5. NAMMCO-mut ilaasortaanerput sumik tunngaveqarpa, aammalu qanoq pingaaruteqartigissagaluarpa, aaliangeraluarutta, ilaasortaa-junnaarusulluta?*

*Akissut 5)*

Oqaluttuarisaaneq tunngavigalugu NAMMCO-p pilersinneqarneranut ilaasortaanermullu tunngaviuvoq nunat imarpiup avannaaniittut arfanniarnermik ingerlataqartut assorujusuaq naammaginngimmassuk nunarsuaq tamakkerlugu arfanniarnermut ataatsimiititaliar-suup (IWC-p) angusartagai aalajangertagaalu aammalu aningaasarsiniutigalugu arfanni- arnerit unitsinniarlugit suliniuteqarnek, kiisalu arfernik mikinernik aqutsinerup ingerlan- neqarnerata tigusissaa sulissutigimmagu. IWC-p aningaasarsiniutigalugu arfanniarneq 1983-imi unitsippaa 1992-imi ammaqqittussanngorlugu, mannaluk tikillugu tamanna pi- simanani. Ilutigisaanik NGO-niit nukiiit annertusigaluttuinnarsimapput tassani ilunger- suutigineqarluni, arferit mikisut aqunneqarneri oqartussaaffigineqarnerilu IWC-mit inger- lanneqalernissaat. Nunat imarpiup avannaaniittut arfanniarnermik ingerlataqartut tama- tumunnga tamarmik akerliupput. Imarpiup avannaani immami miluumasut pillugit ataatsimiititaliaq (NAMMCO) pilersinniarlugit suliniutit pilersinneqarput. Tamanna 1992- imi pivoq isumaqatigiissullu atsiorneqarpoq Nuummi. Nunat imarpiup avannaaniittut nam- minneq ataatsimiititaliaqarnissartik aalluppaat, sunniuteqarnissartik aammalu uumasut aqunneqarnerinik ingerlatsinissartik suliniutigalugu kiisalu ilisimatuussutsikkut misissu- inerit ingerlanneri ataqatigiissaarnerilu ingerlanniarlugit. Suleqatigiinneq tamanna naammaginartumik ingerlanneqarpoq.

Kalaallit Nunaat nunat tamat akornanni, nunarsuup immikkoortuini aammalu nunat marluk akornanni suleqatigiiffinni immami miluumasut pillugit isumaqatigiissuteqarfigisamini ilaasortaavoq. Kalaallit Nunaat NAMMCO-mi ilaasortaajunnaarnissaminik aalajangissa- galuaruni aamma/imaluunniit qilalukkat qaqortat qernertallu pillugit Canada peqatigalugu ataatsimoorussamik ataatsimiititaliami (JCNB-mi) ilaasortaajunnaarnissamik aalajangis- sagaluaruni, FN-imi imavissuit pillugit isumaqatigiissummi artikel 65-imi, immami milu- umasut ataatsimoorussat pillugit aqunneqarnerini suleqatigiittussaaneq, unioqqutissa- vaa. Uumasunut piasartakkatsinnut atorluakkatsinnullu nunarsuaq tamakkerlugu aala- jangersaasarnernut toqqaannartumik Nunatta sunniuteqarsinnaanini annaassavaa. Kalaallit Nunaat NAMMCO-mit aamma/ imaluunniit JCNB-mit anissagaluaruni suleqatigi- iffiiit ilisimatuussutsikkut misissuinerimut tunngasut annaassavai taamaalillunilu ilisimas-

anik avitseqatigiinnerit ataqatigiissaarinerillu annaaneqassallutik. Piniakkanik assigi-  
inngitsunik misissuinerit nunat allat suleqatigalugit ingerlatagut Kalaallit Nunaata kisimiil-  
luni ingerlassinnaanngilai, suliassaasorujussuusut akisoorujussuusullu.

Ilanngullugu eqqaaneqassaaq Kalaallit Nunaata tatigineqarnini annaassammagu, nunat  
tamat akornanni, nunarsuup immikkoortuini aamma nunat marluk akornanni isu-  
maqatigiissuteqarfiusuniit anissagaluaruni. Ullumikkut nunarsuarmioqatigiinni kisimiilluni  
iliuseqarniarneq ajornakusoorujussuuvoq nunarsuaq tamakkerlugu pisussaaffiit  
aallutinngikkaanni, imartani atorluakkagut nunat saniligut peqatigalugit agguakkagut  
amerlammata. Piniagassat assigiinngitsut pillugit suleqatigiiffiit suleqatigiunnaassa-  
galuarutsigit nunarsuarmit Kalaallit Nunaata tatisimaneqarnissaa qularnanngilaq. Kalaallit  
Nunaat kisimiilluni ingerlatsisinnaanngilaq.

6. *NAMMCO-mut ilaasortaaneq aningaasartuuteqarfua, taamaappallu  
aningaasartuutit taakku qanoq annertutigipapt akiliutitsinnullu suut pis-  
sarsiarisarpagut?*

*Akissut 6)*

NAMMCO-mut ilaasortaanitsinni Kalaallit Nunaata Aningaasanut Inatsisitigoortumik ukiu-  
mut kr. 432.000-it ilaasortaanermut akiliutigisarpai. Tamatuma saniatigut ukiumoortumik  
ataatsimiinnermi billet-sinut ineqarnernullu aammalu suleqatigiisitat ataatsimiinnerinut an-  
ingaasartuuteqarpoq. Billet-sinut ineqarnermullu aningaasartuutitut ilaapput KNAPK-mit  
aallaartitaq ataaseq amerlanerpaamillu marluk.

Ilaasortaanermut akiliutit ilisimatuussutsikkut immap miluumasuunik misissuinerit  
ataqatigiissaarnerinut atorneqartarput. Akiliutit ilisimasat misilittakkallu kiisalu piniutit  
pitsanngorsarnerinut suliniutinut aammalu attuumassuteqanngitsumik nunat NAMMCO-  
mut ilaasortat piniarnerini nakkutilliinermut alapernaarsuinerinut atorneqartarput. Akiliutit  
aamma NAMMCO-p allaffeqarfianut Tromsø-miittumut atorneqartarput.

7. *Naalackersuisut sammisamut tunngassuteqartunik allanik ilisimatitsis-  
suteqarsinnaappat?*

*Akissut 7)*

NAMMCO'p aammalu JCNB-p ilisimatuussutsikkut ataatsimiititaliaasa suliatick ataqatigiis-  
sartarpaat aammalu Novemberimi 2020-imi ilisimatuussutsikkut nalunaarusiaq, Qaa-  
naami qilalukkat qaqqortat pillugit nutaanik innersuussutinik imalik saqqummiullugu.  
Nalunaarusiaq nutserneqarluni ingerlanneqarpoq NAMMCO-p ilisimatuussutsikkut  
suleqatigiissitaliaani suliarineqassalluni aammalu naatsorsuutigineqartutut JCNB-p 2021-  
mi ataatsimiinnissaani, Covid-19 B 117-lu akornusiissanngippata. Qimusseriarsuarmi  
Tunumilu qilalukkat qernertat misissuiffigineqarnerisa naammassinissaat suli  
utaqqineqarpoq, Covid-19-imik akornuserneqarsimasut.

Inussiarnersumik inuulluaqqusillunga



Jens Immanuelson  
Aalisarnermut, Piniarnermut Nunalerinermullu Naalackersuisoq